

Pauro Epeso ezektsa bo ziwatahaka

Pauro Epeso ezektsa tuk niapykyrykspyk petok ziytyk tsehe. Sesus soho ty nisispirikpoko iwaze mekybotu niparakzo. Aibatohi Pauro sakyriukanikitsa hurukwy eze niapykyryk. Sesus soho kytsa nisispirikpoko iwatsahi kytsa sakyriukanikitsa hurukwy zioqtyhyryk anaeze hi Epeso ezektsa bo ziwatahaka, Deus soho ty nisispirikpoko. Deus hyrikoso ituk niapykyryk iwatahi Deus harere ziwatahaka, abaka katsa kino niwatihi iwatahaha humo tanymyryky.

¹ Uta Pauro. Deus zikwatawy iyzkoho my iki-ahatsa Epeso ezektsa bo piwatahaka. Ikiahatsa Sesus Kiristu harere bo hyĩ tsimykaranaha iwatsahi ahaspirikporētsa. Tubabatu Deus kape niy:

— Ikia myzubahatsa bo tsimy. Wasaniha ty sibo tytsasoko — niy.

Yhĩ iky.

² Uta tihi:

— O Deus myzo. Sesus Kiristu mypehakatsa my hĩ. Ikiahatsa Epeso ezektsa bo tysisapywyky. Ahahumo sakurētsa moziknaha hĩ — my. Iwa Deus bo ahatsyhyryze ikpamykysoko hĩ.

Kiristu humo Deus mymysapywykik.

³ Kyze katsaktsa Deus Sesus Kiristuzo bo tsimypamykysoziukunahaktsa kytsa! Atahi isapyrēnikia ty mybo nyny niy. Atahi ihyrikoso

mybo zipaha atakta mytuk mynapykyryk hỹ.
Iwatsahi katsa:

— O Deus ikia zuba tsamysapyrẽta. Ikia amysakihikynikita ahumo ka mykurẽta — tsimykaranaha. ⁴ Deus mybarawy nizukni. Isuknihybyze katsa ityrykta nimywatawy. Nawa Sesus Kiristu tuk nimywatawy. Tubabatu katsa mysapyrẽta nimysukni tsihikik iwatahi nimywatawy. Deus tatyrykta bete nimysukni iwa nizihikik asakta pisapywyikiknaha iwatahi Kiristu nimywatawy.

Tapara myhyritykyhybyri eze myhumo tsimypokzitsiarẽta. ⁵ Atahi nimysukniwy iwatsahi ihyryta babatsa tsimoziknaha. Sesus Kiristu mymytsumuẽhĩ naha humo hi tsihyrinyrẽta iwaze ihyryta babatsa tsimoziknaha iwa niyzi-hikik. Katsakta ihyryta babatsa tsimoziknaha iwa tatu tuka nikara. ⁶ Iwaze Deus bo tsimysak-ibazikiknahakta!

— O Deus myzo ikia myhumo ka tsamypokz-itsiarẽta. Iwatahi Sesus mybo zipaha mymytsumuẽhĩ, iwaze mybarawy ezekta bo inasik mywata niyzik. Ikia zuba tsamysapyrẽta. Batu aty tohi ikia wata. Katsa tynamysapywyikik batu ihuakbaratu tsimyzihikik iwatsahi ahumo mykurẽta. Ikia wasani hỹ — tsimykaranaha.

⁷ Deus tse babata myhumo tsimypokzitsiarẽta ituk hi tsimynapykyknaha. Iwatsahi mykurẽta. Atahi mysapyzeky nihyrikosokda. Kytsa iharapatawyhyta humo zihyriziknaha iwaze zibezenaha. Iwaze Deus bo mymyoktyhyryk. Nihyrikosokdaze imysapybara ty tsikykaranaha ana humo hi Deus nimyokzohik ihumo

nispiriktsokda. Hawa batu imysapy tsimykaranaha abaka batu mykparawy. Deus tse humo mymysapywyikik. ⁸ Iharere baba ana kino mybo nitsasoko ana humo hi hyĩ tsimykaranaha iwatsahi myspirikporẽtsa.

⁹⁻¹⁰ Iharere Sesus soho tisapyrẽna hĩ. Tubabatu Deus tihi:

— O Kiristu zipehata sizubarẽtsa pehatsa mozik. Nanabyitaba abazubata mozik. Bijoikpe ezektsa mybarawy ezektsa kino niwatihi iharere bo zuba hyĩ mynakananaha — niy. Abaka iharere tsinymyrynaha. Iharere mybo motsasoko. Nawa puruze piwatawy iharere Kiristu soho wasani my iwa botu nikara. Aba atsatu mybo motsasoko.

¹¹⁻¹² Tapara katsaktsa Sudeutsa tsimaha Kiristu taperyikik. Atahi Deus bo mymyoktyhyryk ata hi taperyky. Tubabatu Deus nimywatawy, Kiristu harere bo hyĩ tsimaha iwatsahi myspirikporẽtsa tsimoziknaha anahi nizihikik. Mysapyrẽtsa tsi-moziknaha niyzihikik. Iwaze kytsa sizubarẽtsa tihi:

— O Deus ikia zuba tsamysapyrẽta myzubatsa atyryktsa moziknaha. Simysapyrẽtsa moziknaha iwatahi tsamysapyrẽta — mykaranaha. Katsaktsa Kiristu humo wasani tsimykaranaha ana humo hi sihyrinymyrẽtsa iwaze Deus bo motsasoziukunaha. Hawa Deus motsaso atsatu mykara. Iwatsahi Sesus Kiristu harere bo hyĩ tsimykaranaha hĩ.

¹³ Ikiahatsa Sudeutsabyitsa mytuk mykaranaha. Ikiahatsa niwatihi Kiristu tuk tsimynapykyknaha hĩ. Deus wasaniha humo mymyoktyhyryk ana soho botu tsiwabynaha

iwatsahi iharere bo hyĩ tsimykaranaha. Sesus Kiristu humo tsikspirikponahaze Deus hyrikoso ahabo zipeha. Ihyrikoso ahatuk mynapykyryk.

Kytsa tahanamy humo tahanaro ziwatahakanaha iwaze ustsya kytsa sinamy pinynahaze ana humo hi sihyrinymyrėtsa. Ana wa hi Kiristu harere humo Deus hyrikoso ahabo zipeha iwaze ityryktsa tsimoziknaha ana humo hi ahahtyrynymyrėtsa hĩ. ¹⁴ Deus hyrikoso mytuk mynapykyryk bykyze Deus isapyrėnikia ty mybo nyny my. Sesus tuktsa myzubarėtsa bo Deus isapyrėnikia ty botu ziperykynaha ana kino mybo nyny my. Iwa botu nitsaso. Iharere wasani my. Ana kino tsinymyrynaha. Deus hyrikoso mybo zipeha iwa iharere soho tsinymyrykynaha. Imysapybyikia ty batu mykparawy iwaze isapyrėnikia ty zuba mybo nyny my nawa botu nitsaso atsatu my. Iwatsahi katsaktsa:

— O Deus myzo ikia zuba tsamysapyrėta. Ikia zuba tsapunihikrėta — tsimykaranaha hĩ.

Pauro Epeso ezektsa tsyhyryze Deus bo nipyamykysoko.

¹⁵ Kyze kytsa ahasoho kabo nitsasokonaha. Siharere tisapyrėna. Asahi:

— O Epeso ezektsa Sesus harere bo hyĩ mykaranaha iwatsahi sispirikporėtsa maha. Tyhapepokzitsikinaha — nikaranaha.

¹⁶ Ana humo ziwabyze ahatsyhyryze Deus bo mopamykysoko. Deus pahasapywy tsihikik ibo hi mopamykyso. Kakurėta ibo mopamykysoikik utahi:

17 — O Deus myzo. Sesus Kiristu mypehakatsa my. Ikia Sesus Kiristu pehatsa tsimy. Myzo ikia zuba tsamysapyrēnikita. Epeso ezeiksa tysitsumuēhīkta! Hawa ja mozurukunaha tsihyrinymyryky. Sihyrinymyrētsa zeka ahumo sispirikporētsa, ana humo kino myzapykyky. 18 Ikia isapyrēnikia ty sibo nyny tsimy. Sesus tuktsa sizubarētsa isapyrēnikia ty sibo nyny tsimy. Iwa botu tsiktsaso. Myzo isapyrēnikia ty tsipiperykynaha. Tsipiperykynahaze tymtsumuēhīkta myzo, tsimaha.

19-20 Ikia zuba tsapunihikrēta ba hawa tohi zasukninaha. Kiristu nihyrikosokdaze ikia hi tsikzihyirizikpowyhykzo. Ikia humo bijoikpe bo nido abaze apanuryk taba modyhyky. Ikia tuk kytsa mysipehaka. Azikwy ty Epeso ezeiksa Sesus tuktsa sisopyk azikwy tuk mozurukunaha.

21 Atakta abazubata my. Myzubatsa iharere bo hyŷ mykaranaha. Bijoiŷpe iknyktsa iharere bo hyŷ mykaranaha. Hyrikoso sapybara wakatsa kino iharere bo yhyŷ mykaranaha. Mybarawy ezeiksa pehatsa sizubarētsa iharere bo hyŷ mykaranaha. Atahi abazubata tsizikwyrēta hŷ.

22-23 Sesus Kiristu hi mybarawy ezeiksa iharere bo hyŷ mykaranaha. Atakta koikny bakta tu batu amy tohi mykara iwatahi tsihyrinymyrēta hŷ. Ihyrikoso nanabyitaba my. Ihyrikoso mytuk mynapykyryk. Iwatahi Sesus Kiristu mype niy:

“Ikiahatsa kanury wata” niy. Hawa kytsa tahnury nisipehakanaha nawa Sesus Kiristu ituktsa mysipehaka. Ikia Sesus Kiristu tuktsa humo tsamypokzitsiukrēta. Iwaze ikia Sesus Kiristu

humo tsimymysapywyikik myzo — my. Iwa ahat-syhyryze Deus bo mopamykysoko.

2

Kiristu humo myspirikporētsa tsimoziknaha.

¹ Tapara ikiahatsa ahamysapybyitsa tsikykaranaha iwaze Deus okzeka batu ahaspirikpo iwatsahi siakbatsa watsa tsikykaranaha. Deus harere bo batu hỹ tsikaha. Hawa siakbatsa sityryk niakba naha tsa wa. Iwa batu ahaspirikpo. Deus zahasapywyky ihumo mekywa tu tsimoziknaha ihumo mekywa tu tsimyzurukunaha. ² Taparaka sispirikpobyitsa harere bo yhỹ tsikykaranaha. Asaktsa Satanas hyrikoso sapybara pehatsa harere piwabyziukunaha siharere bo kino yhỹ tsikykaranaha. Satanas bijoikpe ikny mybarawy bo izumu anaeze mozuruku. ³ Katsa Sudeutsa niwatihi ahawatsa zikzurukunaha. Mysapybyitsa tsikykaranaha, hawa mytsaty tsikykaranaha ana kino mysopyk. Taha bo zuba ziknakaranaha. Katsaktsa wasani tsimaha mytsaty ahabyitsa tsikykaranaha iwa mypetu mysopyk. Deus mype niy:

— Ikiahatsa Sudeutsa ustsā kytsa watsa tsimaha, kaokzeka batu ahamysapy tsimaha. Sinini ykarawy bo pahapehahik — niy.

⁴ Deus hiba myhumo tsimypokzitsiarēta. Katsaktsa iharere bo ma mysopyk byitsa tu iwatatu myhumo imysapyrēta mymysapywy tsihikik hỹ. ⁵ Katsaktsa tsikyhyrikosokdanahaze iwaze myspitu tsikyzikzonaha tsawatsa. Katsaktsa mysapybyitsa tsikykaranaha iwaze

siakbatsa watsa Deus inamyhyrizikpowyhykzo. Sesus wata inamyhyrizikpowyhykzo iwatsahi iharere bo zuba hyŷ tsimykaranaha. Iharere zuba mykparawy iwa hawa Deus mozihihik katsa kino niwatihi tsimyzihihiknaha. Ana humo niyze mynamy batu ziake. Batu amy tohi ty zihuaknaha. Atahi myhumo tsimypokzitsiarēta babata iwa niy.

⁶ Deus Kiristu zihyrizikpowyze jobo bijoikpe bo nido. Anaeze ituk tawahi mynapykyryk. Katsa kino niwatihi iharere bo hyŷ tsimykaranahaze isoho bo mytsaty tsimykaranaha. Botu Sesus Kiristu tuk tsimynapykyryknaha, mybarawy ezeiksa Deus hyrikoso botu namykse iwatsahi ituk tsinapykyryknaha hŷ. ⁷ Deus myhumo tsimypokzitsiarēta iwatahi Kiristu Sesus nimitysumuēhīkī. Nimitysumuēhīze hawa Deus mozihihik ziawawiky. Isapyrēnikia mybo pinyny tsihikik ana hi tsinymyryknaha. Utsa kytsa mysoho tihi:

— Hawa Deus mysisapywyky — mykaranaha.

⁸ Deus myhumo tsimypokzitsiarēta iwatahi mymysapywyky. Sesus izumuze tazo bo mymyoktyhyryk niy. Katsa zuba zeka Deus bo ba zikumunaha. Iwatahi Deus myzo Sesus zipedahik atahi Deus bo mymyoktyhyryk ihumo zuba Deus tyryktsa tsimoziknaha hŷ. Katsa ibo batu amy tohi ihuak ty nyny zikaha. Deus zuba isapyrēnikia ty zuba mybo nyny niy.

⁹ Katsaktsa Deus tyryktsa tsimoziknaha. Deus hi tatyryktsa nimysukniwy iwatsahi katsa batu tyso.

— O mysapyrėtsa iwatsahi Deus tyryktsa tsimoziknaha — tsimaha. Iwa batu aty tohi tyso. Deus zuba katsa ityryktsa nimysukniwy Sesus humo Deus bo mymyoktyryk my. ¹⁰ Abaka Deus tyryktsa tsimaha mekywa tu tsimoziknaha. Sesus Kiristu harere bo hyỹ tsimykaranaha iwatsahi ihumo myspirikporėtsa mekywa tu tsimyzurukunaha. Sesus tuktsa sizubarėtsa ihumo simysapyrėtsa moziknaha. Tubabatu Deus tihi:

— O katyryktsa Sesus Kiristu watsa mozurukunahaze ana kino moziknik. Utsa kytsa mysitsumuėhĩnaha iwa mozurukunaha hỹ — niy.

Iwaze mymytsumuėhĩnaha nawa kytsa bo moziknik atsa tu mymytsumuėhĩkĩnaha hỹ.

Parakbaha Deus tyryktsa tsimoziknaha.

¹¹⁻¹² Tapara ahaspirikpobyitsa zikzurukunaha. Ana bo mytsatytaha Kiristu harere bo batu hỹ tsikaha isoho humo batu ahaspirikpo. Ikiahatsa Sudeutsabyitsa tsimaha. Ahanury humo iwatawyhybyitsa Deus wasania ty batu ahawabyhy. Sudeutsabyitsa tu batu Isareu tsekokatsa ka. Bipyritsa tsikaha. Deus wasania ty Sudeutsa ziperykynaha ana kino batu ahawabyhy iwatsahi hawa tisapyrėna batu mytsaty tsikykaranaha. Deus kytsa mysitsumuėhĩ tsihikik ana humo hi batu ahahyrinymyry.

¹³ Abaka meky watu tsimaha. Wasani tsimykaranaha. Sesus Kiristu iharapatawyhyta humo zihyrizikiknaha iwaze zibezenaha. Mysapyzeky nihyrikosokdaze Deus bo mymyoktyhyryk niy. Katsa ihumo myspirikporėtsa tsikyziknaha iwaze Deus bo

mymoktyhyryk. Iwatsahi ahape mysopyk mytukytsa tsimykaranaha. Batu bipyritsaka tsimaha. Myzubarētsa iharere bo zuba hyŷ tsimykaranaha.

¹⁴ Taparaka katsa sisukyrytsitsa abaka myzubarētsa Kiristu harere bo hyŷ tsimykaranaha iwatsahi taharapepokzitsikinaha. Sudeutsa, Sudeutsabyitsa kino niwatihi ihumo myspirikporētsa iwaze myharereziuwytša tsimoziknaha. Taparaka metutu ziknakaranaha ipokpedawy waha abaka ihumo nihokda. Katsaktsa ikiahatsa kino niwatihi Deus tyryktsa tsimaha.

¹⁵ Tubabatu Deus harere Moises bo nitsaso. Anaharere Moises ziwatahaka. Sudeutsa anaharere tsizubarēna bo yhŷ ziknakaranaha. Tsihokdaharēna. Anaharere bo yhŷ nikaranahaze simysapybyitsa nikaranahaze iwaze Deus nisiokzohik. Anaharere humo hi yhŷ nikaranahaze batu zikaha. Abaka Deus harere ezytyk wasani iwaze iokzeka mysapyrētsa tsimoziknaha. Kiristu myzubaha sapyzeky nihyrikosokda iwatsahi ihumo mekywa tu tsimoziknaha. Sudeutsa, Sudeutsabyitsa kino niwatihi abaka atsaesubaha tsimyzurukunaha. Iharere bo zuba yhŷ tsimykaranaha iwatsahi taharapepokzitsikinaha hŷ. Iwa Deus okzeka mysapyrētsa tsimoziknaha. Katsa ikiahatsa kino niwatihi Deus tyryktsa tsimaha.

¹⁶ Kiristu iharapatawyhyta humo zihyryziknahaze nihyrikosokda kytsa sizubarētsa sapyzeky nihyrikosokda iwaze Deus simysapybyitsa nikaranahaze nisiokzohik. Abaka Deus Sesus tuktsa bo mysisapywyky. Asaktsa

Sudeutsa, Sudeutsabyitsa kino niwatihi Sesus tuktsa sizubarëtsa mysisapywyky. Ihumo myspirikporëtsa Sesus harere bo zuba hyÿ tsimykaranaha iwatsahi batu mysukyrytsitsa tsimaha. Ihumo taharapepokzitsikinaha, Sudeutsa Sudeutsabyitsa kino niwatihi, abaka atsaesubaha ityryktsa tsimaha.

¹⁷ Sesus Kiristu mybarawy bo inasik iwaze Deus wasania ty tsiwabynaha. Tapara ikiahatsa Sudeutsabyitsa Deus harere batu ahahyrinymyry abaka Deus wasania ty tsiwabynaha iwatsahi ahakurëtsa. Katsaktsa niwatihi tapara Deus harere Moises ziwatahaka ana humo hi myhyrinymyrëtsa. Abaka Deus wasania ty tsiwabynaha iwatsahi mykurëtsa. Deus Sesus humo batu iakyri, myhumo batu iakyri iwa ityryktsa tsimoziknaha. Deus Sesus tuktsa sizubarëtsa mysisapywyky batu iakyri. ¹⁸ Kiristu mysapyzekenihyrikosokda iwatsahi mykurëtsa Deus myzo okzeka mysapyzekeniyzik. Ihyrikoso mybo natasapy. Sesus humo myspirikporëtsa iwatsahi Deus bo tsimypamykysonahaze myharere piwabyky.

¹⁹ Iwaze ahakurëtsa tsimoziknaha. Abaka Deus tyryktsa tsimaha. Ikiahatsa taparaka bipyritsa abaka batu, Deus tyryktsa tsimoziknaha. Deus hyrytsa tsimaha.

²⁰ Ikiahatsa Sesus Kiristu mypehakatsa tuktsa tsimaha. Katsaktsa Deus ykzohotsa wasania ty ahabo tsinatsasokonaha iwatsahi Sesus humo ahaspirikporëtsa tsimaha. Deus sohokotsa niwatihi siharere bo hyÿ tsimykaranaha. Ikiahatsa Sesus humo ahaspirikporëtsa iwatsahi

katsaktsa mysopyk mytuk kytsa tsimaha. Hawa kytsa wahoro mozoknikinaha haraharetsa mysizozokonahaze kywa anawahi myharere Deus sohotsa sihyrinymyrykytsa kino niwatihi Sesus tuktsa siharere bo hyĩ mykaranahaze Deus tyryktsa moziknaha. Hawa kytsa wahoro mozoknikinahaze tapara harahare tsiziurēta zik mahaze ustsā haraharetsa ty ibaze zozo mykaranaha wa. Ata harahare tsiziurēta humo ustsā haraharetsa buruhuwa babatu zozozo mykaranaha. Sesus Kiristu hi harahare tsiziurēta wata atakta tapara piziknahaze tawata iwaze ituktsa haraharetsa watsa ihumo buruhuwa zozozo mykaranaha iwaze Deus tyryktsa tsimoziknaha. Sesus Kiristu humo atahi myhyrizikwanita.

²¹ Hawa kytsa haraharetsa iharahorokwytsa ty, hwitsa iwa wahoro humo zozozo mykaranaha ana waha Deus Sudeutsa, Sudeutsabyitsa kino niwatihi kytsa sizubarētsa ityryktsa moziknaha.

²² Tapara Deus wahoro zubata anaeze zik-napykyryk. Abaka Sudeutsa, Sudeutsabyitsa sizubarētsa situk mynapykyryk. Deus hyrikoso situk mynapykyryk iwatsahi sizubarētsa Sesus harere bo hyĩ mykaranaha ihumo sispirikporētsa moziknaha, situk mynapykyryk. Iwahoro zubata wata my. Ikiahatsa Sesus harere bo hyĩ tsimykarana ha ihumo ahaspirikporētsa tsimoziknaha iwaze ahasopyk mytukytsa. Deus hyrikoso mytuk atsa ezubaha mynapykyryk katsa Deus wahoro zubata watsa tsimaha.

Pauro Sudeutsabyitsa bo tarabaja nikara.

¹ Iwaze uta Pauro ahatsyhyryze Deus bo mopamykysoikik. Ikiahatsa Sudeutsabyitsa ahahumo kamypokzitsiarēta. Deus wasania ty ahabo iktsasoko iwatahi kytsa katsipa humo zikoktyhyryknaha, siakyriukrēnikitsa hurukwy bo zikoktyhyryknaha. ² Deus imysapyrēnikita my wasania ty ahabo zikpehahik ana soho botu ziwatahaka. Ana kino kok tsiwabynaha.

³ Tubabatu Deus tihi:

— O tapara Sudeutsa zuba katyryktsa abaka kytsa Sudeutsabyitsa kino niwatihi katyryktsa moziknaha mysitsihikik — niy. Ana harere humo hi batu kahyrinymyry. Batu aty tohi hawa nizihikikze batu ihyrinymyry. Kyze Deus kape niy:

— Pauro Sudeutsabyitsa bokta! Wasaniha ty sibo tytsasokta! Asahi katyryktsa moziknaha mozihihikik, iwatahi sibo papeha my — niy.

⁴ Hyĩ iky. Deus soho kabo nitsasoko ana soho humo hi ahabo tsikaeni zuba botu ziwatahaka.

⁵ Deus Sudeutsabyitsa soho mozihihikik kytsa batu sihyrinymyry. Aba zuba Deus ykzohotsa bo, isohotsitsa iwatsa taharere soho ihyrikoso humo nisihyrinymyryky hỹ. ⁶ Sudeutsabyitsa tu Deus wasania ty Sesus harere bo yhỹ mykaranaha zeka Sudeutsa atsatu maha. Sudeutsa sisopyk mytukytsa maha. Deus isapyrēnikia ty Sudeutsa bo botu nitsasoko, ana kino Sudeutsabyitsa bo niwatihi mysisapywyky. Iwaze Sudeutsa, Sudeutsabyitsa niwatihi asahi sizubarētsa Sesus harere bo hyỹ mykaranaha ihumo sispirikporētsa astsa watsatu maha sibo hi Deus mysisapywyky hỹ.

⁷ Deus wasania ty Sesus soho motsasoikik nawa kahyrikiziksokzawy my. Utakta Deus tsyhyryze tarabaja mykara. Kahyrikiziksokzawy humo ziktsumuēhīkī. Izikwy humo zuba tarabajazu mykara, Deus kahumo tsimypokzitsiarēta iwatahi zikpeha kytsa sizubarētsa bo wasania ty motsasoko.

⁸ Taparaka uta kamysapybyita tu ziknakara abaka mahani. Sesus tuktsa simysapyrētsa maha. Taparaka Sesus tuktsa humo kakyrirēta ziknakara. Deus hi kahumo tsimypokzitsiarēta iwatahi zikwatawy. Sudeutsabyitsa bo zikpeha iwaze wasania ty sibo motsasokoro. Kiristu koikny baktatu hawa tisapyrēna ituk zuba mynakara, ana soho humo batu myhyrinymyry. Abaka Deus harere wasania ty motsasoko. Kiristu isapyrēnikia ty myhyrinymyrētsa anahumo hi Deus zikpeha.

⁹ Tapara Deus mybaratsa harere ty batu tyso. Aiba zuba tsasohowy kytsa sizubarētsa bo mysihyrinymyry tsihikik iwatahi zikpeha. Iharere motsaso ana humo hi zikpeha. ¹⁰ Iwa niy. Deus hyrinymyrywy baba ty myzubaha bo motsaso tsihikik. Sizubarētsa bo ihyrinymyrywy baba motsaso tsihikik. Bijoikpe iknytsitsa sitsumuēhītsitsa sibo motsaso tsihikik. Hyrikoso sapybara watsa niwatihi sibo motsaso tsihikik. Abazubatsa Sesus tuktsa bo iktsa mynakaranahaze Deus soho humo sihyrinymyrētsa. Sesus tuktsa sisapyrētsa moziknaha iwaze sizubarētsa Deus hyrinymyrywy baba humo sihyrinymyrētsa hỹ. Sesus harere bo hỹ tsimykarana sibo Deus hyrinymyrywy baba motsasokonaha.

¹¹ Hawa Deus mytsaty nikara, atsatu wasani mykara. Abaka Sesus Kiristu harere bo hyĩ tsimykaranaha zeka Deus hyrytsa tsimoziknaha, Deus sohowy atsatu wasani my. Iwaze ihyrinymyrywy baba atsaesubaha bo ziwatawy.

¹² Iwaze mypehakatsa harere bo hyĩ tsimykaranaha iwa tsimyzurukunaha. Abaka batu mypyby. Iwatsahi Deus bo tsimypamykysoikiknaha. Atahi mymywabyky. Atahi mymykusukniki. Ibo hyĩ tsimykaranaha iwatsahi myspirikporētsa abaka batu mypyby.

¹³ Iwatsahi ahakurētsaktsa! Kaharere tsiwabyziukunahaktsa! Deus wasania ty ahabo iktsasoko iwatsahi kytsa piksukyrykynaha. Kahumo ahasukatsihik byihuja! Deus pahasapywyky iwatahi kakurēta. Ahatsyhyryze sinini mykara ikiahatsa humo tisapyrēna iwatahi kakurēta my.

Hawa Kiristu myhumo tsimypokzitsiarēta.

¹⁴ Iwatahi ahatsyhyryze myzo bo mopamykysoikik. ¹⁵ Deus myzo koikny baktatu mynakara katsaktsa Sesus tuktsa ihyrytsa tsimaha. Asahi myzubaha bijoikpe eze tu mybarawy ezektsa kino niwatihi ihumo sispitu maha. Myzubarētsa ihyrytsa tsimaha hĩ.

¹⁶ Ahatsyhyryze ipe my:

— O myzo ikia zuba tsapunihikrēta. Azikwy tisapyrēna. Ahyrikoso Epeso ezektsa tuk mynapykyryk asa kino ihumo sipunihikrētsa moziknaha.

¹⁷⁻¹⁸ O myzo tysitsumuēhĩkta. Iwa tsimykaraze aharere bo hyĩ mykaranaha, iwa Sesus situk mynapykyryk ana kino myzapypyky. Hawa hwi

puẽtsikbyita iharatatsa zihiboani iwatahi ba zik-natsihipetok. O myzo Epeso ezektsa Sesus tuktsa ikia humo sipunihikrẽtsa moziknaha. Iwa hwi iharatatsa zihiboani watsa asaktsa Sesus harere bo hỹ mykaranaha ikia humo sipunihikrẽtsa moziknaha. Iwaze asaktsa batu tyso Sesus my-humo tsimypokzitsiarẽta ja. Batu mynyhy. Iwa batu tyso. Sesus myhumo tsimypokzitsiarẽta ana kino myhyrinymyrẽtsa maha h̃y. Sispirikporẽtsa tybyi zubataha.

O myzo Sesus tuktsa myzubarẽtsa ahumo tsihyrinymyrytohikta! Kiristu myhumo tsimypokzitsiarẽta h̃y ana humo kino tsihyrinymyrytohikta. Sesus mymypokzitsiki ba zipyk tawahi myhumo tsimypokzitsiarẽta. Ana kino sihyrinymyrẽtsa h̃y ana humo hi mozihikik. Iwa batu aty tohi hawa Sesus myhumo tsimypokzitsiarẽta tsihyrinymyrẽta babata.

¹⁹ O kazo isapyrẽnikia ty sibo tsinyny tsihikik ana kino botu tsiktsaso. Aharere isapyrẽnikia soho atsatu wasani sitsyhyryze myzapykyky — my.

Iwa Deus myzo bo ahatsyhyryze mopamykysoko.

²⁰ O Epeso ezektsa Sesus tuktsa Deus bo tsimysakibazikiknahaktsa! Ipe tsimaha:

— O myzo ahyrikoso mytuk mynapykyryk h̃y. Iwaze ahyrikoso humo azikwy mytuk mynapykyryk iwatsahi mykurẽtsa h̃y. Ikia zuba tsamysapyrẽta. Ikia zuba apunihikrẽnikita. Ikia zuba amysakihikynikita. Hawa abo tsimyzapykykynahaze Sesus humo yh̃y tsimykara. Hawa mytsaty tsimykaranahaze ana humo hi tsihyrinymyrẽta. Katsa

tsimyzapykytohinahaze mymytsumuēhĩkĩ
azikwy tisapyrēna hỹ.

²¹ O myzo katsakta Sesus tuktsa ikia bo mywahi
tsimysakibazikiknaha. Sesus Kiristu mymysapy-
wyky iwatsahi atuk mywahi tsinapykyryknaha
hỹ. Yhỹ tsimaha — iwa myzo bo tsiksakibazikik-
naha hỹ.

4

Sesus tuktsa atsatu ty mytsaty mykaranaha.

¹ Utakta Sesus soho iktsasoikik naha humo
siakyriukrēnikitsa hurukwy bo zikoktyhyryknaha.

O kytsa kaharere bo wabyziutaha! Deus hi
zahawatawy iwatsahi ihyrytsa tsimoziknaha
iwaze wasani tahakta! ² Katsa zuba
myhyrinymyrētsa batu ahasopyk. Ahahokani
byrihuja. Ahakubyrisorokuja! Batu ahabo zuba
tsimykaranaha tyharape pokzitsikinahakta!

³ Myzo hyrikoso mymysapywyky iwatsahi
mykurētsa tsimykaranaha. Katsakta atsa
botu mytsaty tsimykaranaha iwatsahi aharape
hahokbyitsa abaka tyharape pokzitsinaha. Ahape
tu ahasopyk:

— Utakta Sesus tuktsa mysisapybaka. Yhỹ
wasani mysisapy tsihikik — my. Iwa Deus my-
humo mozihihikik.

⁴ Myzo nimywatawy iwatsahi ituk mywahi
tsimynapykyryknaha. Nimywatawyze Sesus
humo myspirikporētsa tsimoziknaha, iwaze
Deus hyrytsa tsimoziknaha. Kiristu harere bo
zuba hyỹ tsimykaranaha iwa tsimyzurukunaha.
Deus hyrikoso estuba zubata atahi mytuk
mynapykyryk. Deus hyrikoso estuba zubata

atahi mytuk mynapykyk zeka Kiristu nury estuba zubata tsimaha. Iwatahi kytsa Kiristu tuktsa soho:

— Asaktsa Sesus nury maha — my.
⁵ Sesus Kiristu mypehakatsa atazubata my. Astatu mymyoktyrykta my. Kytsa nimyharasusuhiknahaze Sesus Kiristu mektsa botu nisiwatawy.

⁶ Deus zuba koikny baktatu atazubata my. Atahi mypehakatsa. Izikwy mytuk mynapykyryk iwa mymytsumuēhīkī. Atahi tawahi mytuk mynapykyryk hỹ.

⁷ Kiristu myhyriziktsokzawy humo nimywatawy ana humo hi mymytsumuēhīkī.
⁸ Tubabatu Kiristu mybarawy bo izumuze Deus sohokotsa botu ziwatahaka:

— Bijoikpe bo ziksizoze tasukyrytsitsa nisioktyhyryk.

Ipunihikrēnikita tu tasukyrytsitsa sizubarētsa tatuk nisioktyhyryk.

Abaka iharere bo zuba yhỹ nikaranaha.

Iwaze bijoikpe bo ziksizoze isapyrēnikia ty tatuktsa bo nyny my — niy.

Iwa botu ziwatahaka, aba zuba wasani my.

⁹ Hawa Kiristu nidoze Deus sohokotsa ziwatahaka. Tapara Kiristu mybarawy bo inasik iwaze nido. ¹⁰ Atakta Sesus bijoikpe ikny mybarawy bo inasik astatu bijoikpe bo nido. Nanabyitaba mypehakatsa myhyrizikwani mozik. Mypehatsa abazubata iwaze ihumo mybarawy tisapyrēna mozik. ¹¹ Atakta Kiristu wastuhu kytsa nisiwatawy. Ispe niy:

— Ikiahatsa kakzohotsa tsimaha iwatsahi Deus wasania ty tytsasonaha kytsa tysihyrinymyry — niy.

Kytsa Sesus humo sispirikpobyitsa bo Deus wasania ty motsasonaha. Iwa Deus tuk mynapykyknaha iharere humo sispirikporëtsa moziknaha. Nanabyitaba Deus wasania ty tsimytsasonaha.

Utsa kytsa nisiwatawy. Ispe niy:

— Ikiahatsa Deus sohokotsitsa kaharere Sesus tuktsa bo tytsasokonaha — niy.

Utsa kytsa niwatihi nisiwatawy. Ispe niy:

— Ikiahatsa wasania ty ziknapamykysokona-hatsa tsimaha. Nanabyitaba sizubarëtsa bo wasania ty tsimytsasonaha — niy. Utsa kytsa niwatihi nisiwatawy ispe niy:

— Ikiahatsa tsinymyrykynahatsa Sesus tuktsa tysihyrinymyry. Tysisapywykynaha sihumo tynasipokzitsikinaha — niy. Iwa my. ¹² Iwaze tyharape pokzitsikinaha. Siharere humo ustsas Sesus tuktsa tynasitsumuëhĩ tsihikiknaha. ¹³ Katsaktsa Kiristu watsa tsimoziknaha, ana hi Kiristu mozihikik. Hawa tisapyrëna my Kiristu mykara. Kyze mopyk tsawa ihumo myhyrinymyrëtsa. Katsaktsa astsatu tsawatsa mytsaty tsimykaranaha. Deus tse Kiristu isapyrënikia soho humo myhyrinymyrëtsa hỹ. Iwaze katsaktsa ustsas Sesus tuktsa niwatihi atsaezubaha iwata tsimoziknaha hỹ.

¹⁴ Kyze Kiristu humo myspirikporëtsa tsimykaranaha iwatsahi iharere humo myhyrinymyrëtsa. Ihyrinymyrywy baba humo myhyrinymyrëtsa. Utsa mymypsikhikbatakanaha

zeka batu waby tsimaha. Utsa mybarapetu mykaranaha zeka siharere humo hi batu hỹ tsimaha. Katsaktsa jabyitsa sopykbyitsa asahi paikpa mytsaty mynakaranaha. Katsaktsa Deus harere bo zuba hyỹ tsimykaranaha. ¹⁵ Ihyrinymyrywy baba humo zuba yhỹ tsimykaranaha. Iwa tyharape pokzitsikinaha. Sesus myharek wata tsimaha. Iwaze katsa wasanitsa tsimoziknaha.

¹⁶ Sesus Kiristu myhumo tsimypokzitsiarēta iwatahi mybo tawahi myzisapywyky. Parakbaha mysitsumuēhĩekik. Iwatsahi katsaktsa niwatihi ustsā bo tahatsumuēhĩnahaktsa! Katsaktsa inury tsimaha. Myni mypoiktsa humo pyryk pyryk mahaze kyik rikto maha. Myni byizeka batu kyik rikto zikaha. Anawata Sesus tuktsa estuba estuba zubata tahahyiriziktsokzawy tsimykaranaha iwaze katsaktsa Sesus harere bo hyỹ tsimykaranaha ihumo myspirikporētsa tsimoziknaha. Kytsa simysapyrētsa moziknaha myharere humo iwa tahatsumuēhĩnaha hỹ. Iwatsahi taharapepokzitsinahaktsa!

Hawa Kiristu harere bo hyỹ tsimykaranaha ihumo myspirikporētsa, meky watu tsimoziknaha.

¹⁷ O katukytsa kaharere bo wabyziutaha! Mypehatsa Sesus harere ahape my. Kytsa Deus soho humo sispirikpobyitsa watsa batu ahasopyk. Asahi paikpa mytsaty nikaranaha kytsa harere humo zuba yhỹ mykaranaha. Ikiahatsa batu. Niwazubaktsa. Siwatsa batu hỹ zikaha.

¹⁸ Asaktsa Deus harere bo batu hỹ niaha, iwatsahi batu sihyrinymyry. Batu ma zikaha Deus hyrinymyrywy baba humo batu sihyrinymyry

iwatsahi kytsa miwa eze nizaranahatsa watsa niyziknaha. Siharerehakyrëtsa asaktsa hawa mykaranaha batu sihyrinomyry. Deus harere humo batu sihyrinomyry, iwatsahi paikpa mytsaty mykaranaha. ¹⁹ Nisikpybybyinahatsa hi ustsā bo mysisapybyrikinaha. Tsōšī zikuikik naha tsahi ihyriziktopyryryk izumu. Nahapewohiknaha. Sisapybyikitsa tihi nikaranaha.

20 Ana hi Sesus Kiristu soho humo
batu ahahyrinymyry. Ahamysapybara
tsimoewynahaktsa! 21 Kytsa Sesus Kiristu
harere bo zuba hyĩ mykaranahaze simysapyrẽtsa
moziknaha. Ana hi botu tsiwabynaha. Ana humo
hi tsikahahyrinymyrykynaha iwaze ikiahatsa
ahamysapybyitsa tsikykaranaha tsimoewynaha.
Myharere tyziwabyziukunahaktsa hĩ.

22 — O katukytsa! Taparaka amy ty batu imysapybara zuba tsikzihikiknaha. 23-24 Anabo hi wasani mytsaty ahabyitsa tsikykaranaha. “Iwa tsimaha zeka ahakurêtsa tsimaha ahape tu ahasopyk” mybarapetu tsikykaranaha. Ana kino batu imysapy iwatsahi batu ahaku. Iwa tsikzurukunaha. Ahasopyk meky watu tsimyzurukunaha. Ahasuk ibykta mysykbaik zeka typapykik kyze ahasuk ezytyk ty korobyk tsimaha. Atawahi ahasopyk batu imysapy tsmoewynaha. Mekywa tu tsmoziknaha. Ahasopykwy ezytyk Sesus humo mytsaty tahaktsa! Sesus tuk tsimyzurukunaha! Ahasuk ezytyk ty korobyk tsimaha asa watsa tihi Sesus sopykwy humo zuba tsimyzurukunahaktsa! Iwaze wasani my tsimykaranaha. Hawa tsimyzurukunaha Kiristu wata tsmoziknaha iwa tsikahahyrinymyrykynaha hỹ — my.

Hawa Kiristu ziknakara ikia niwatihiktsa!

25 — O katukytsa! Taparaka ahamyspihik-batarētsa ziknakaranaha. Abaka ahamyspihik-bata byihuktsa wasape tynakaranaha. Hawa wasani haty zuba tsimykarana hã. Katsaktsa atsaeszubaha Sesus tuktsa tsimaha ana humo hi ahamyspihikbata byrihuja.

26-27 Kytsa humo ahakyri zeka niwazubakta! Haramwe junubabyizetu tynakokozonaha ahakoko byizeka Satanas harere bo yhã tsimykarana. Aty wahoro hokbowy zoksapare my zeka usta mytsuk, katsa mykoko byizeka Satanas mytuk mymykniki. Iwatsahi ahakyri byihuja.

28 Aty ahatuktsa tsitsyhyryboarēta ziknakara zeka ustsā namy ty ka tyakse akse byity. Abaka tarabaja tykta. Iwaze tsipanamy ustsā kytsa bo nyny tsimy. Tsipanamyze hi wastuhu anamy ty sinamybyikitsa bo nyny tsimy.

29 Asaktsa ahatuktsa siharerewabymybarētsa tu zeka niwazubakta. Ahaharere tisapyrēna humo zuba ustsā bo tynapamykysonaha iwaze tyharape hapokzitsikinaha. Ustsā bo tysitsumuēhĩnaha hã. Iwaze kytsa ahaharere piwabynaha zeka: “O anaharere hi tisapyrēna my” maha.

30 Iwa tsimyzurukunaha zeka Deus hyrikoso ahahumo tsakurēta mynapykyryk. Imysapybara tyty tsimykarana zeka Deus hyrikoso ahahumo batu iaku. Deus hyrikoso zahawatawy iwatsahi Deus tyryktsa tsimoziknaha ahahyrinymyrētsa. Hawa Deus hyrikoso imysapyrēnikita my ikiahatsa niwatihi ihumo ahamysapyrētsa tsimoziknaha.

Ikiahatſa Deus hyrikoso tuk tsimynapykyknaha atahi bijoikpe bo mymyoktyhyryk. Deus ipe my:

“Hana puruze Sesus tuktsa kabo tysioktyhyk” my. Iwaze pahaoktyhyryk. Deus bo bijoikpe bo pahaoktyhyryk hỹ.

³¹ Iwatsahi pykyhytutaha! Harape humo ahaty kyri kyri byitaha! Ahape ty myija myija byitaha. Ahaty betsak betsak byitaha! Aty iotutsa pauksitsa humo takyriki tsiharerewabymy-barẽta mozik. Iwaze ana kino tsimoewynaha!

³² Ikiahatſa hi kytsa bo tysisapywykynahaktsa! Ahahyryzikporẽtsa tyharape pokzitsikinahaktsa! Ahamysapybyitsa tsikykaranaha Deus pahaokzohik. Sesus Kiristu humo Deus mymyokzohik ispiriktsokdatawata my. Iwatsahi ikiahatſa niwathiktsa. Aty batu imysapy abo my zeka ikia imysapybara ty nikara tsiptokzohik, mahani byitatu tsimyzuruku. Ikspiriktsokdatawata. Deus ahamysapybyitsa tsikykaranaha Sesus humo pahaokzohik iwatsahi uſtsa imysapybara tsiptokzohik hỹ Deus wata my — my.

5

O myzubaha Sesus watsa tsimyzurukunaha.

¹ Ikiahatſa Deus hyrytsa tsimaha. Atahi ahahumo tsimypokzitsiarẽta hỹ. Iwatsahi ahamysapyrẽtsa tsimoziknaha. Hawa kytsa hyrytsa tahazotsa mysisopykzukunaha ikiahatſa Deus watsa tsimykaranaha. Ahazo watsa tsimoziknaha. ² Uſtsa tysisapywykynahaktsa! Kiristu watsa tsipisapywykynahaktsa! Atahi myhumo tsimypokzitsiarẽta iwatahi

mysapyzeky nihyrikosokda. Tapara kytsa siraratsa ziknasibakanaha iwaze Deus bo ziknasiwezokonaha ana humo hi simysapybyitsa nikaranaha Deus nisiokzohik atawatsa Sesus nihyrikosokdaze mymysapybyitsa tsikykaranaha Deus ihumo nimyokzohik. Deus tihi:

— O Sesus Kiristu mybarawy ezektsa sapyzeky nihyrikosokda ta humo kakurēta. Hawa jok-morēnikia waok myze kakurēta anawahi Sesus nihyrikosokda iwatahi ibo iktsa myze kakurēta my. Mybarawy ezektsa humo tsimypokzitsiarēta babata ziwatawy — niy.

³ Ikiahatsa hi Deus tyryktsa tsimaha. Iwaze hawa wasani zuba tahaktsa! Kytsa ahaturke usts akeza bo iktsa zuba taha. Taokeza zuba mysipyryryna. Wytykyryk kino niwatihi tahabariktsa humo zuba ziktahasipihiknaha. Amy ty batu sisopyksapy wytykyryk nisiakzobyrikinaha batu mytsaty tsimykaranaha. Ahazokdi byihuja! Ahazokdibyitsa zeka mektsa namy ba zikzihikiknaha. ⁴ Ikiahatsa zuba wytykyryk nury soho tsimypamykysokonahaze ahamysupehe byihuja. Ahaharerewabymy-barabyihu ja. Anawaze ahaharere humo usts kytsa bo batu mysimiywyky. Ahamykni byihuja tynapykyknaha. Wasaniha ty tsimaha zeka ikiahatsa Deus pe tihi:

— O ikia zuba tsamysapyrēta. Nawa nizukni tsizubarēna tisapyrēna iwatsahi mykurētsa — tsimaha. Iwa tsimytsasokonaha. ⁵ Atakta ustatsa bo tahyrizikwy zeka Deus tuk batu tawahi zikakpykyk. Wytyk usta maku bo tahyrizikwy zeka atatsa katsa Deus tuk

batu tawahi zikykykyk imysapybara bo mytsaty mynakaranaha asahi Deus tuk batu tahawahi zikakpykyknaha. Utsa namy tsihitsa watsa mynazihikiknaha batu Kiristu tyryktsa asahi sizokdirētsa Deus tuk batu tahawahi zikakpykyknaha.

Kiristu harere bo zuba hỹ tahaktsa kytsa!

⁶ Kytsa asahi Deus harere bo batu h̃y zikaha Deus tuk batu tahawahi zikykykyknaha. Kytsa ahape naha zeka:

— O hawa tsimyzurukunaha wasani tsimaha. Iwatsatu ahamysapybyitsa tsimykaranaha zeka ikiahatsa Deus tuk ahawahi tsimynapykyryknaha — mybarapetu nikaranaha. Anaharere batu wabyziu zikaha. Asaktsa mopamykysonaha zuba.

⁷ Siharere bo waby waby byitaha! Deus tihi:

— Kytsa kaharere bo batu h̃y zikahaze katuk batu tawahi zikapykyryknaha — my. Iwatsahi siharere bo ka waby waby byitahaktsa.

⁸ Taparaka wasaniha humo batu ahahyrinymyry. Kiristu harere humo batu ahahyrinymyry. Iwatsahi ahamysapybyitsa tsikykaranaha. Kytsa miwa ezektsa watsa tsikzurukunaha iwatsahi Kiristu harere bo batu h̃y tsikykaranaha. Deus harere humo batu ahahyrinymyry h̃y. Abaka meky watu tsimykaranaha. Sesus Kiristu harere bo hỹ tsimykaranaha ihumo meky watu ahaspirikporētsa tsimoziknaha. Hawa kytsa iwororo haburuk tu mokurunaha ezektsa watsa tsinymyrykynaha iwatsahi imysapybara bo batu h̃y tsimykaranaha meky watu tsimoziknaha.

⁹ Ikiahatsa hi Kiristu harere bo hỹ tsimaha

zeka kytsa humo tahasapywykynaha. Wasani tsimykaranaha. Kytsa bo ahaspihikbata byihuja ahaharere wasani zuba tsimykaranaha.

Iwa Kiristu harere bo hyĩ tahaktsa! ¹⁰ Ahape tu ahasopyk:

— Hawa Deus mozihihikik naha zuba tsimyzihihikknaha iwatsahi isopyk ty tanymyry tsihihikik. Deus ykparawy humo tanymyryky — tsimaha. ¹¹ Kytsa Sesus harere bo yhyĩ ahabyi zeka sisopyksapybyitsa mykaranaha. ¹² Ikiahatsa batu situk tsimaha. Asaktsa kytsa watsa asahi miwa eze pyrikpyrik mykaranaha kytsa papatu simysapybyitsa mykaranaha. Simysapybyitsa nikaranaha ana soho tihi batu tyso. Mysikpybyrẽtsa simysapybyitsa nikaranaha humo. Ikiahatsa ispe tsimaha:

— O kytsa ahamysapybyitsa tsimykaranaha ana ty kino “niwazubakta” tsimaha — my.

¹³⁻¹⁴ Miwaka rika ty pok mahaze kywa mypubyize mynamy bo iktsa tsimaha. Anawahi Kiristu harere kytsa bo tsimypamykysokonahaze simysapybyitsa mykaranaha anasoho humo hi sihyrinymyrẽtsa. Ahaharere rika wata mozik. Iwororo ha eze kywa mypubyi mozik. Anawahahi Kiristu harere tsimytsasokonahaze kytsa simysapybyitsa nikaranaha nisihyrinymyrykynaha iwaze iharere humo simysapybyitsa nikaranaha sitsyhyryze piwatawyky. Tapara aty zeka:

— Ikiakta tsipuruziukze popotyкта kyikyкта ikia amysapybyita tsiky kara naha humo ibezehe tawata tsimy.

Tsikahazoziknahaktsa! Kiristu harere bo zuba yhyĩ tahaktsa!

Hawa kytsa iwororo ha eze kywa mokurunaha
ikiahatsa siwatsa tsimaha hawa wasani
tsinymyrykynaha.

Kiristu harere humo wasanitsa tsimoziknaha
— nikaranaha.

Iwa botu ziwataha.

¹⁵ Kaharere bo wabyziutaha! Ahape tu ahasopyk:

— O hawa haeze tsimyzurukunaha wasani ja
tsimaha. Sispirikponikitsa — tsimaha. Iwa
ahasopyk. Hawa tsimyzurukunaha pykyhytu
tahaktsa! ¹⁶ Mybarawy ezeaktsa simysapyby-
itsa mykaranaha. Ikiahatsa batu. Mekywatu
tsimoziknaha. Kytsa tysisapywyikiknahaktsa!
Tysitsumuēhīnahaktsa. ¹⁷ Iwatsahi mypehakatsa
Sesus harere bo wabyziutahaktsa! Ahasopyksapy
byihuja! Ikiahatsa hi mypehakatsa harere bo
mysatyziu tsimynakaranaha iwatsahi iharere bo
zuba hyŷ tsimykaranaha.

¹⁸ Tsōsī ty ka tsō tsō byitaha. Kytsa tsōsī ty
pikukunaha zeka batu saku. Tahakyri humo
sisopyksapybyitsa mykaranaha. Tsōsī humo batu
imysapy mykaranaha. Ikiahatsa batu. Deus
hyrikoso ahatur mynapykyryk ana kino tuzi-
hikiknahaktsa!

¹⁹ Tsikzumubanahaze Deus bo tysakibazikik-
nahaktsa! Ikia zubaze kino niwatihi Deus bo
tysakibazikikta! Hawa taparaktsa Deus bo nisak-
ibazikiknaha ikiahatsa kino niwatihi tsimaha.
Hawa Deus sohotsitsa nisakibazikiknaha ikia-
hatsa atsatu tsimaha. Deus hyrikoso humo
iharere tuk tsimysakibazikiknahaktsa! ²⁰ Iwaze
nanabyitaba ikiahatsa Deus bo tsimysakibazikik-
naha. Ikiahatsa tihi:

— O Deus myzo ikia zuba amysapyrënikita. Ikia zuba apunihikrënikita, ikia amysakikynikita iwatsahi ikia humo ka mykurëtsa tsimaha — my.

Iwa Deus bo tsimypamykysokonaha hỹ.

Kytsa, wytykyryk kino niwatihi tuharape pokz-itsinaha.

²¹ Kyze Deus harere bo yhỹ tynakaranaha. Sesus Kiristu harere bo zuba hyỹ tynakaranaha iwatsahi ahaspirikporëtsa tsimoziknaha. Utsa Sesus tuktsa harere bo kino niwatihi yhỹ tsimykaranaha.

²² Wytykyryk ikiahaka kino Kiristu harere bo hyỹ taha. Atsawatu ahapytsa harere bo yhỹ tynakaranaha. ²³ Kiristu mypehakatsa harere bo zuba hyỹ tsimykaranaha. ²⁴ Katsaktsa ituktsa tsimaha. Atahi myharek wata my. Katsaktsa inury watsa tsimaha. Sesus Kiristu tazo bo mymyoktyhyryk mykara. Iwatsahi iharere bo hyỹ tsimykaranaha. Atsawatu wytykyryk kino ahapytsa harere bo zuba tynakaranaha iwazahi ahapytsa ahapehatsa harere bo yhỹ tynakaranaha.

²⁵ Kytsa kaharere bo wabyziutaha! Ahaokeza humo ahamypokzitsiukoktsa! Tysitsumuëhĩnahaktsa! Hawa Kiristu myhumo tsimypokzitsiukoktsa ikiahatsa kino niwatihi ahaokeza tysipokzitsinaha! Kiristu myhumo tsimypokzitsiarëta mysapyzekenihyrikosokda. Aparakbaha bo nihyrikosokda. ²⁶ Kiristu harere humo mysapyrëtsa tsimoziknaha. Kytsa momurunaha zeka siziurëtsa moziknaha. Astsatu Kiristu harere bo yhỹ tsimykaranaha zeka

siziurētsa watsa tsimoziknaha. Iharere humo ahamysapyrētsa tsimoziknaha. ²⁷ Kiristu hi:

— O katuktsa katuk ahawahi tynapykyryknaha. Wasani tsimoziknaha. Ahamysapyrētsa tsimoziknaha anawahi mozihihikik — niy.

²⁸ Atsawatu kytsa ahaokeza tysipokzitsinaha. Hawa Kiristu aparakbaha humo tsimypokzitsiukrēta iwatsa kytsa ahaokeza tysipokzitsinaha. Amy ty tisapyrēna tsimyzihikiknaha batu ababo zuba zikaha. Isapyrēnikia humo ahaokeza bo kino niwatihi tsimyzihikiknaha.

²⁹ Isapyrēnikia ty ahaokeza tsyhyryze tsiberinaha niwatihi. Ikiatu tsizapokzitsiki. Aparēta zeka tsipadisaha. Arapukrēta zeka tsipuku. Iwatahi isapyrēnikia ty hyryk tsimy zeka atsatu ahaokeza bo nyny tsimy. ³⁰ Kiristu wata tsimoziknaha. Atahi namypokzitsihikik. Atahi:

— O katuktsa ikiahatsa kanurywatsa, iwatahi pahapokzitsihikik — my. Iwa mysopyk mykara. — Kiristu tatuktsa humo tsimypokzitsiarēta iwatahaktsa kytsa ahaokeza humo ahamypokzitsihu. ³¹ Deus harere mype maku tasukzaze tazo perek taje perek my. Taparaka atazuba zikzuruku. Tasukza zeka mahani, taoke tuk mynapykyryk. ³² Kiristu tuktsa humo tsimypokzitsiukrēta ana watsa hi kytsa tahaokeza humo simypokzitsiukrētsa. Anasoho hi piwatawyky. Tapara ana soho humo batu myhyrinymyry aba zuba tsinymyryknaha.

³³ Kiristu tatuktsa humo tsimypokzitsiukrēta babata, atawahi ahaokeza tysipokzitsinahaktsa! Tapara isapyrēnikia ty ababo zuba hyryk zikaha, abaka batu, isapyrēnikia ty ahaokeza

bo kino niwatihi taha. Wytykyryk ikiahaka ahapytsa harere bo yhỹ tsimykaranaha hỹ. Iwa tuzurukunahaktsa — niy.

6

Hawa sizotsa tahahyrytsa humo mysisakihikynaha.

¹ — O jabyitsa ahazotsa harere bo hỹ tahaktsa! Siharere tsipiwabyziunaha zeka ma tsimaha. Ahajeza harere bo niwatihi hỹ tahaktsa! Siharere bo ma tsimaha zeka Deus ispe my: “O asaktsa wasani mykaranaha” — my. ²⁻³ Tubabatu Deus tyryktsa pe niy. — Ahazotsa harere bo hỹ taha. Ahamyharerewabyrëtsa zeka aibani zuba tsimhyrikosokdanaha — niy. Deus harere tisapyrëna iwatsahi ahazotsa ahajeza kino niwatihi siharere bo ma taha. ⁴ — O myzotsa ahahyrytsa humo ahahokani byrihuja ahaharere humo siakubyitsa mykaranaha. Siaku byizeka sioktsiukrëtsa moziknaha. Ikiahatsa hi ahahyrytsa Kiristu harere humo tysihrinymyrynaha. Iwaze Sesus sopyk wa mozurukunaha iwa ikiahatsa soho humo ahapokwatu mykaranaha — my.

Hawa sipehatsa tahatsumuëhëtsitsa humo sisopyk.

⁵ Abaka kytsa ahahyriziktsokzaharëtsa kaharere bo wabyziutaha! Ahapehakatsa pahapehanaha zeka yhỹ tsimykaranaha. Sihyriziktsokzawy soho pahapehanahaze yhỹ tsimykaranaha. Ahape tu ahasopyk batu tyso. — O ana hyriziktsokzawy humo batu hỹ — tsimaha. Ahahyriziktsokzawy humo ahapykyhytutaha!

Ahapehatsa harere bo yhỹ tsimykaranaha watihī Kiristu harere bo hỹ tynakaranaha. ⁶ Tarabajaziu tykaranahaktsa! Ahapehatsa pahasukparanaha zeka tarabajaziutaha. Ahapehatsa ahaty sukpara habyize kino niwatihi tarabajaziutaha. Kiristu tuktsa humo ahasopykziurētsa h̃y. Iwa Deus mozihihik ana humo hi ahasopykziurētsa tsimoziknaha. ⁷ Ahape tu ahasopyk:

— O kahyriziktsokzawy kapehatsa bo mykara. Sesus Kiristu bo kino niwatihi. Iwatahi pisapybaka — tsimaha. ⁸ Sesus Kiristu mypehakatsa babata. Atakta abazubata. Mybarawy ezektsa pehakatsa babata my, atahi ihuak ty sihyriziktsokzawy humo kytsa aparakbaha bo nyny my. Anabo hi mytsatyziu tahaktsa kytsa! ⁹ O sipehatsa abaka ikiahatsa pe my:

— Asaktsa ahatsyhyryze ahahyriziktsokzawy humo mykaranaha tysisapywykynaha. Ahamypybyty byihuja. Ahasakimyskry byihujataha. Asaktsa ahatsyhyryze tarabaja mykaranaha. Deus hyrytsa maha ikiahatsa kino niwatihi Deus hyrytsa tsimaha. Iokzeka astsabani. Iwatsahi ahakzozihuktsa! Myzo bijoikpe eze mybarawy ezektsa aparakbaha bo mysisapywyky. Ana humo hi ahaspiriktsokda byihuja kytsa! — my.

Deus sodadu suk imiokbyita wata ahabo nyny my, iwaze ahapunihikrētsa tsimoziknaha.

¹⁰ Aba pepykyk, kaharere ahabo motsaso pahatsumuēh̃ tsihikik. Ahapunihikrētsa tsimoziknaha ana humo hi pahatsumuēh̃.

Ikiyahatsa Sesus Kiristu humo ahaspihikrētsa iwatsahi ahaspirikporētsa tsimoziknaha. Atahi ipunihikrēnikita my ba hawa tohi zikzukninaha. Iharere bo ma tsimykaranaha zeka izikwy ahatuk mynapykyryk.

¹¹ Sodadutsa pehakatsa sisuk ty mekywahaty ty sodadutsa bo nyny my. Sisuk ty imiokbyita iwatsahi sisukyrytsitsa ba ziksibanaha. Deus zikwy mytuk mynapykyryk. Iwatsahi mypunihikrētsa tsimoziknaha izikwy sodadutsa suk imiokbyita wata my. Katsahi:

— O myzo azikwy ty mybo nynytny — tsimaha. Yh̃ mykara. Iwaze Satanas harere bo batu h̃ tsimaha Deus zikwy humo, Satanas pahaspihik-batakaze iharere bo batu h̃ tsimaha.

¹² Mybarawy ezeksaktsa mysukyrybyitsitsa maha. Hyrikoso sapybara watsa mysukyrytsitsa maha. Sinurybyitsa tu mysukyrytsitsa babatsa maha. Hyrikoso sapybara myhumo batu siakparawy mymysukyryikiknahatsa maha. Iwatsahi siharere bo batu h̃ tsimaha. Asaktsa mysukyrytsitsa babatsa h̃. Asahi namysapybyrikinaha. Kytsa Sesus humo sispirikpobyitsa hi siharere bo yh̃ mykaranaha. Sizubarētsa mysipehakanaha iwatsahi sisopyk watsa mozurukunaha. Asaktsa Sesus harere bo batu h̃ zikaha sispirikpobyitsa tu hyrikoso sapybara pehakatsa sipehakatsa niyzik. Asaktsa unata zuba siakparawy kytsa papa tu simysapybyitsa tu nikaranaha iwaze miwa siakparawy.

¹³ Iwatsahi Deus zikwyty tsimyzapykykynaha. Sodadutsa sisuk imiokbyita watsa ikiahatsa

hi Deus zikwy tsimyzapykykynaha. Deus zikwy ahatuk mynapykyrykze ahapunihikrētsa tsimoziknaha. Ahaspirikporētsa tsimoziknaha Deus zikwy humo hyrikoso sapybara harere bo batu hỹ tsimaha.

¹⁴ Mybarawy ezektsa niwatsorokonahaze sisuk ty mekywaha tu korobyk niaha. Sisuk imiokbara ty korobyk niaha iwatsahi sisukyrytsitsa ba zik-sibanaha. Ikiahatsa sodadutsa watsa tsimaha. Tapara sodadu tasukpesuk ty izezharēnikia ty korobyk niy. Tazikoikaĩwy ty haĩ niy. Ikiahatsa batu ahamyspihikbata. Wasani zuba tsimytsason-aha ikiahatsa sodadu zikoikaĩwy watsa. Iwaze wasani tsimyzurukunahaze ikiahatsa sodadu suk imiokbyita ty korobyk niy tawata tsimaha. Hawa isuk imiokbyita humo ba zibezenaha, ikiahatsa wasani tsimykaranaha humo hyrikoso sapybara humo ahakyzohokbyitsa maha.

¹⁵ Deus mybarawy ezektsa humo tsimypokzit-siarēta iwaze wasania ty Sesus Kiristu soho tsimyt-sasokonahaze sodadutsa watsa. Sodadutsa pyry-suktsa ty simiokbyitsa ty korobyk maha siwatsa tsimaha.

¹⁶ Sesus Kiristu humo ahaspirikporētsa! tsimynakaranaha. Ihumo tsimyspirikponahaze sodadutsa watsa tsimaha. Sodadutsa orokpedawy imiokbyita. Iwaze sisukyrytsitsa orobiktsa ty iharazōrō ba zizaknaha. Atawahi hyrikoso sapybara pehaktsa mybo nimykzoikik iwatahi imys-apybara myhumo nazihikik. Niwazubakta! Kat-saktsa Sesus Kiristu humo myspirikporētsa imys-apybara humo ba hỹ tsimaha.

¹⁷ Sesus Kiristu mymyoktyhyrykta tazo bo mymyoktyhyryk. Sesus watsa tsimoziknaha ana hi mozihihikik. Taperykyze sodadutsa watsa. Sodadutsa tsorik imiokbyita taharek humo pu maha. Ikiahatsa hawa mytsaty tsimykaranaha pykyhytutaha. Iwaze Deus harere humo mytsaty tynakaranahaktsa! Deus hyrikoso iharere ty pahahyrinymyryky iwatsahi ikiahatsa sodadutsa watsa tsimoziknaha. Sodadutsa sokorotsapuzeze tyryeze kiihiwa. Hawa sodadu isukyrytsa nisiba sokorotsapuzeze tyryezekihiwa ty ikiahatsa Deus harere humo Satanas harere nepykba.

¹⁸ Deus bo tynapamykysonahaktsa! Hawa Deus hyrikoso mozihihikik ana hi tyzapykynahaktsa! Ahazikara byihuja tsiperykynahaktsa. Deus bo tynpamykysonaha. Tsibytuhukutunaha. Ikiahatsa tihi:

— O myzo Sesus tuktsa tsyhyryze tsimyzapykynaha. Nanabyitaba atyryktsa tsyhyryze tsimyzapykynaha. ¹⁹ Asaktsa mysitsumuēhĩ. Pauro kino niwatihi tsipitsumuēhĩ. Hawa wasania ty Sesus soho motsasoko tsipitsumuēhĩkĩ iwaze usts kytza bo ihumo sihyrinymyrētsa moziknaha. Tsiakusukniki. Atahi ahumo ipybybyita tu wasania ty motsasoziu! myzo tsimaha — my. Taparaka Deus Sesus Kiristu soho humo batu mymyhyrinymyry abaka kytza sizubarētsa mymyhyrinymyrykynaha.

²⁰ Deus zikpeha iwatahi iharere motsasoikik. Abaka iharere humo kytza siakyriukrēnikitsa hurukwy bo zikoktyhyryknaha. Iwatsahi Deus bo katsyhyryze tsimyzapykyikiknaha. Wasani

mykara ana hi ibo tsimyzapykyikiknaha. Ikiatatsa tihi:

— Myzo azikwy ty Pauro bo nyny tsimy iwaze aharere motsasoziuku. Ipybybyita azikwy humo tsipunihikrēta mozik — tsimaha.

Aba mopykykze kytsa bo mytsaty mykara.

²¹ Tikiko kasoho ahabo motsaso. Ata humo kamypokzitsiarēta mytsy babatawa my. Mypehatsa Sesus tsyhyryze tarabajaziu mynakara. Tsiakzoziurēta tarabaja my. Tsiakubyrisorokrēta.

²² Iwatahi ahabo pipeha, hawa mynakara ana soho ahabo motsaso. Iwaze ikiahatsa batu tyso:

— Pauro ja. Yh̃y ja — tsimaha. Atahi ikiahatsa tuk mopamykyso.

Deus pahasapywyky.

²³ Deus bo ahatsyhyryze mopamykysoikik. Ipe my:

— O Deus myzo, mypehakatsa Sesus Kiristu niwatihi ahyrytsa bo tysisapywykynaha. Ba paikpa mytsaty zikaha, ikia hi tysiakuwyky. O myzo tysiťsumuēh̃i uťsa kytsa wasani sisopyk. Sesus Kiristu harere bo hỹy mykaranaha iwaze ihumo mospirikpotohinaha iwa tysiťsumuēh̃ikta!

²⁴ O myzo tysisapywyky. Amy humo siaku byizeka sibo tyzapykykta iwaze atuk tahawahi mynapykyryknaha. Sesus humo sipunihikrēťsa moziknaha — my.

Iwa Deus bo ahatsyhyryze mopamykysoikik. Nepyk niwazuba.

Pauro

Deus Harere Aibaky Sesus mymyspirikpoko naha

New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
2f0260ea-5969-5180-9ac5-183d63a989f1